

〔宋〕 許叔微

類證並目濟本事方續集

歷代中醫珍本集成

類證普濟本事方續集卷一

宋許叔微先生著

紹興吉生裘慶元校刊

治諸虛進食生血氣并論

夫人稟陰陽五行運氣榮衛而保全其身一凡身中或有毫杪疾患無非因臟腑虛冷臟腑虛冷則榮衛不調榮衛不調則疾生矣又況虛冷之極又能生其虛陽或手足腰腎及眼目口齒三焦六腑值病之亟則各能死人且如左右手三陽三陰十二經脉皆須用有胃氣或加之有疾而無胃氣者不問病之輕重不救何謂須用有胃氣緣胃受穀氣穀氣生則能生氣血氣血壯則榮衛不衰榮衛不衰則病自去矣如五臟六腑表裏之間皆出自穀氣而相傳授生氣血而灌蔭五臟或氣血不足則五臟六腑蔭無所自況加之於憂愁思慮喜怒不

常起居勞役飲水不節房事過多衝雪冒霜伏暑鬱熱損失耗散則病生焉且如季春夏季秋季冬一十八日之間脾土於此時旺極每遇此際腎水受尅故當補腎所以心肺肝脾腎各有衰旺各有相生相尅如心尅肺肺尅肝肝尅脾脾尅腎腎尅心遇旺則尅之愈甚凡受尅處故宜補然春補脾夏補肺秋補肝冬補心古之賢人平居無病亦常用方藥法度調護脾胃使進飲食而全穀氣凡百皆得其宜如今之庸醫用意皆錯姑舉一二而爲證然且如腎經衰敗則以天雄附子之類而言補腎且腎本屬北方壬癸水喜濕惡燥反用天雄附子至燥藥豈能補乎腎耶況腎經虛則乃五臟六腑衰極而漸至腎則諸病生焉凡下部腎經虛者不必補之至妙之法有二一則但補脾護胃使進飲食而全穀氣一則所謂生血氣者可每日夜半子時乃北方正候當此之時腎水旺極則攝血化精精氣全則實腎經不虛病自去矣男子則攝血化精女子可通

月事若穀氣不全則氣血不生氣血不生則當夜半子時腎水雖旺則血不能償其腎所攝無精可化丹田不固腎目虛矣以此觀之凡腎經并五臟虛敗醫者不識源流枉用其法初不能損於病乎今則具列先補脾胃後調氣血二方并法悉皆備集予不欲私爲己有用傳好事云耳

戊巳圓治丈夫婦人稟賦怯弱飲食無味氣血衰敗肌肉不生項背拘緊腰脚無力胸膈膨脹多睡少寤終日昏朦夜多異夢及積年脾蟲時下惡心噫酸吐水小兒吐乳大人翻胃並皆治之此藥能護脾開胃進飲食長肌肉生氣血化精益髓全胃氣丹田不竭腎經不虛是此藥功也

茴香三兩揀淨 甘艸一兩炙 浮椒五兩乃胡椒也揀淨 人參一兩

白朮二兩 朱砂半兩 白茯苓三兩 香附子半兩

右爲細末生薑汁打麵糊爲圓如梧桐子大每服二十圓空心白湯送下服

又方

石菖蒲二兩 白茯苓三兩 白朮二兩 茴香一兩半 青皮一兩 枳殼一兩 麩炒去穰

右爲末每服二大錢棗湯調空心服

又方

枳殼二兩 木香一兩半 丁香半兩 青皮一兩半 去白 牡蠣二兩半 甘艸 白茯苓一兩

右爲細末米飲送下三錢不計時候

又方治大人婦人小兒唇青面黃肚裏冷痰牽引小腹以至翻胃換食嘔吐口苦舌乾少寐多寤腳手不掣遠年日近一切脾胃冷病悉能除愈有一婦人年四十餘患十年翻胃面目黃黑歷三十餘人醫不取效脾腧諸穴燒灸交遍其

疾愈甚服此藥不五七日間頓然無事緊忍服至一月日遂去其根自是服之
不三五服些少脾疾立便瘥平能全胃氣生肌肉進飲食順榮衛常服大有補
益悉試悉驗幸毋忽焉

人參一兩 茯苓二兩 附子七錢重炮去皮臍一兩 牡蠣一兩煨 粉
草半兩 黃芪一兩鹽炙

右爲末每服三大錢鹽湯點服忌生冷油麵粘膩等毒物無不效者甚妙
又方

浮椒二兩 茴香二兩 粉草一兩

右三味每爲末服二錢熱湯點服忌毒如前

化癥圓治丈夫婦人小兒年深日近沉積癥塊面色黃青時上搶心吐水吞酸
舌生白沫婦人積年月經不調漸成血氣或蠱塊中焦之間復如杯盤連年累

月漸至瘦瘠寒熱往來一切脾胃受寒久不痊愈之疾並皆治之

巴豆五兩去油膜 蓬莪朮三兩醋煮 三稜三兩醋煮 丁香皮二兩

木香一兩半 厚朴三兩 石菖蒲二兩 良薑一兩 蟲蟲一兩半 川

牛膝一兩 香附子四兩 石蓮二兩

右爲細末稀麪糊爲圓如小菉豆大積年癥瘕成塊第一服用熱水下二十圓自後每日三圓五圓更量虛實加減與之五日去盡積塊日近脾胃有積者每服五圓飯飲吞下一服取效婦人血氣成塊及血瘕每服二十圓蘇木用酒童子小便各一半煎五七沸令溫空心吞下自後每日用溫酒下三圓其血塊遂旋消從大小二便去盡自知小兒蛔蟲腹痛不能忍日夜叫喚百藥不救者橘皮湯下七圓立效諸蟲皆下常服白湯或薑湯下三五圓中酒及酒積大便鮮臭者白湯薑酒各半吞下七圓立效如神一切噎塞心下硬

痛皆用棗湯下五圓不拘時候

衛真湯治大人婦人元氣衰憊榮衛怯弱真陽不固三焦不和上盛下虛夜夢鬼交覺來盜汗面無精光唇口乾燥耳內蟬鳴腰背倦痛心氣虛乏精神不寧驚悸健忘飲食無味日漸瘦悴外腎濕痒夜多小便腰重冷疼牽引小腹足膝緩弱行步艱難婦人血海久冷經候不調或遇期不至或一月兩來赤白帶下漏分五色子宮感寒久不成孕並皆治之此藥大能生氣血遇夜半子時腎水旺極之際償腎收攝男子攝血化精實丹田填五臟諸病未萌之前皆能製治使不復爲梗是藥也每服多寡具列在前

川當歸三兩 人參一兩半 金釵石斛五兩 茯苓 木香 肉豆蔻
山藥各三兩 生地黃二兩半 熟地黃三兩 丁香一兩 青皮一兩
川牛膝二兩童子小便酒各半浸一宿

右爲細末每服三大錢溫酒調下鹽湯亦得空心食後一服婦人諸疾用童子小便同溫舊酒調空心下

丙丁圓生血養氣升降水火化精補腎

附子一個九錢重者炮 川烏一個七錢重者炮 當歸二兩 赤芍藥五兩 沉香五兩

右爲細末浸當歸酒煮稀糊爲圓如梧桐子大朱砂爲衣每二十圓漸加三十圓食前空心鹽湯酒下婦人淡醋湯下

又方治男子婦人一切虛冷之疾活血駐顏減小便除盜汗治婦人久不生產似滯疾而非其時有遺瀝並皆治之功驗不可具述

蒼朮 吳茱萸 破故紙 胡盧巴已上各一兩 川薑 草烏已上各半兩並炮 山藥二兩

右各炮治同爲末醋糊圓如梧桐子大每服十五圓空心溫酒鹽湯任下婦人艾醋湯下日二服丈夫四十歲已上者可常服耳目永不昏聩髮髮不白又方回陽小浴法

川烏 沉香 紫稍花 蒺藜 蛇床子酒浸一兩 兔絲子各等分
右爲末冷熱水圓如彈子大每服一圓湯三大椀椒二合葱二握用闊口瓶同煎二椀去却葱根椒安身於瓶口上薰如入得手則浴之冷便止女人帶下赤白者依此薰之留取藥得三次溫過薰洗妙

又方治後生大人婦人房事不節漸至虛損行步如踏空夜夢從高墜下及夢大小諸般水等並皆治之常服永無虛病雖二十歲亦可服

人參 白茯苓 川牛膝酒浸一兩 地骨皮眞者 川當歸 熟地黃各等分

右爲末煉蜜爲圓如梧桐子大每服三十圓溫酒或鹽湯空心下常服只二十圓用三五匙乾飯壓下服三五日後每日飽飯後及臨臥時服局方鷄蘇圓五十粒不嚼破熟水吞下次又服前藥百病皆去雖百歲鬚髮不白此藥余曰二十歲服之不歇甚妙

又方治後生丈夫酒色過多下元虛憊膝軟乏小便滑數外腎濕痒

兔絲子五兩 石蓮肉二兩 白茯苓一兩 山藥二兩 茴香二兩 五味子五兩

右爲末稀糊爲圓如荳大每服四十圓溫酒或鹽湯空心下如脚氣及脚膝無力者木瓜酒空心五十圓晚餐前再服立效

又方補虛損老少皆可服一切虛證並皆用之

人參 桂 茯苓 黃耆 熟乾地黃 川芎 甘艸 川當歸各等分

右各依法事治爲末每服二大錢水一盞生姜三片棗子二枚同煎至七分空心服

又方治勞嗽及虛證及鼻流清涕耳作蟬鳴眼見黑花一切虛症丈夫婦人皆可服少年服亦不妨

北五味子二兩 鼈甲三兩厚物 地骨皮三兩

右爲末煉蜜圓如梧桐子大空心食前溫酒或鹽湯任意服三五十圓婦人醋湯下此方乃曲江人家秘方余服之大有功效處方有理者人皆欽羨妙甚妙甚

又方補虛損治勞倦一切虛極欲垂死者

甘艸三兩 蒼朮一斤米泔浸一宿切作片子用茱萸白一斤細切同令盒過一宿 川椒四兩 草烏半斤水浸一宿切作片子同鹽四兩令盒一宿次

日炒乾

右共爲末用好舊糟六斤同搗三五十杵令勻爲圓如梧桐子大每服二十三十圓空心溫酒鹽湯任下婦人淡醋湯下

又方治胸滿氣噎下部冷腹痛

半夏八兩 生薑六兩 橘皮四兩 桂二兩 吳茱萸五兩湯泡洗一次
右咬咀用水十升煮取四升分五服冷又再溫空心食前服余少年時曾患
臍腹疝痛初不疑其虛遍服諸家藥無獲效者余遂診之則覺是虛證合此
藥一劑服未至半劑頓然痊癒

又方治下部冷極臍下及小腹痛不可忍者一服取效

赤石脂 乾薑各十兩

右二味爲末麪糊爲圓如碗豆大每服十圓至三十圓空心飯飲下日三服

御方二仙散治腎氣

蓬莪朮一兩 茴香二兩 阿膠三錢真者

右三味爲末每服二錢溫酒調下

金鎖正陽丹

砒一兩火煨 巴豆十兩去油 烏頭一兩炮 木鼈六個 雄黃半兩

右以上併爲末用黃臘瀝青好者各一兩半黃丹一兩朱砂一兩半細研溶
熱入前頃藥末乘熱圓如鷄頭子大每服一圓常服空心鹽湯下小腸氣痛
炒茴香酒冷下木通煎湯下滑腸脫肛乾薑艾同煎酒溫下心氣痛燒錢淬
醋下二圓氣塊嚙乾杼子下一圓婦人紅脉不行及產後諸疾當歸酒下眼
多冷汨鹽椒湯下

類證普濟本事方續集卷一終

類證普濟本事方續集卷二

宋許叔微先生著

紹興吉生裘慶元校刊

治諸積熱等疾

治脚氣毒遍內外煩熱不解口中生瘡狂走毒厲及解中諸熱藥毒邪熱卒黃等解蟲毒鬼魅野道熱毒又治小兒驚癇熱病

寒水石 石膏 磁石 滑石已上四味各三斤搗爲末用水一石煮至四斗去滓入後藥 玄參 羚羊角四兩 升麻五兩 丁香 木香半兩 甘草八兩已上六味搗爲末入前藥汁中再煮去一斗五升去滓入下頃二味 朴硝三斤 消石好者二斤已上二味入前藥汁中微火煎不住手持柳木筥攪候有七八升許投在水盆中半日久欲凝後却入後頃二味 朱

砂三兩 麝香一兩三錢重乳細已上三味入煎藥汁中拌調令全勻

右當寒之一日每服一錢匕或二錢冷水調下大人小兒子細加減食後服
又方治大人小兒五臟積熱煩躁多渴昏烈喉閉目赤鼻衄頰結硬口舌生
瘡陽明證傷寒發狂見鬼譫語大小便秘一切風壅並皆治之

川大黃 山梔子仁一兩 朴硝二兩 連翹 薄荷二兩 甘草一兩

乾葛 赤芍藥一兩

右爲剉散每二錢水一盞入竹葉七片蜜三匕同煎至七分去滓食後服法
陽明證傷寒空心下此藥局方亦載綠味數與藥不同予唯一之用大姪段
婦忽患熱病欲死付之一服立效後來屢服屢驗伏幸毋忽

又方

白朮 荊芥 赤芍藥各三兩 大黃 車前子各二兩生 木通三兩